

Deklarasaun Bancada Partido Democratico

Debate Programa do V Governo Constitucional – 2012 - 2017

Bloku Koligasaun iha Parlamento Nacional

Matenek, halo ita fasil atu hana'i malu, maibe susar atu haneha malu. Matenek, halo ita fasil atu ukun malu, maibe susar atu sai atan ba malu.

Ne'e, mak prinsipiu Partido Democratico nian, hodi sai mata dalan ba vizaun "Kaer Metin Ukun Rasik An no Hari Nasaun hosi Baze". Ne'e mak fiar ida, nebe lori Partido Democratico, hodi hola parte iha ukun koligasaun nian, ba tinan lima oin mai.

Koligasaun CNRT, PD no Frenti Mudansa, nudar esperansa politika ida, atu hana'i malu no hamaluk malu, hodi kaer ukun no bandu, tuir kbit intelektual ida-ida nian, no sensibilidade moral, politika no sosial, tuir lisan no kultura Timor oan sira nian.

Konsiente ba partisipasaun iha ukun AMP 2007-2012, maka, Partido Democratico mos haklaken ba publiku tomak, katak, Inisiativa politika lubun ida, nebe transforma liu hosi programasaun no aktividades ukun nian, implementa ona no hetan duni progresu no susesu, iha ukun koligasaun AMP nian, iha tinan liu ba.

Maske nune, Partido Democratico mos konsiente katak, mehi no esperansa bot liu, mak formula ona sistematikamente iha Planu Estrateziku Dezenvolvimentu, basa, PED nudar konkretizasaun hosi vontade politika atu hadi'a povu nia moris, valorizasaun ba ita nia rekursu rasik, hodi fo biban ba partisipasaun sidadan, banune, ita hotu bele hahi no hametin integridade nasional, nudar nasaun ukun rasik an.

Program ba tinan Lima nebe governu koligasaun elabora no apresenta iha uma fukun Ida ne'e, nudar materializasaun hosi PED. Programa ba tinan Lima ne'e nudar programa politiku ida, maka integradu nebe sei konkretiza no implementa fazeadamente liu hosi planu de asaun anual, hodi difini objectivu spesifiku no strategiku nebe klaru, no garante continuidade no versatilidade ekzekusaun hodi responde ba realidade maka ita nian rain hasoru.

Ho razaun ida ne'e, maka Partido Democratico haklaken ba publiku katak hosi diresaun, membrus no simpatizante tomak, fo nia apresiasaun positiva ba programa do V Governu Constitucional ba Legislatura 2012 – 2017. Partido Democratico mos kompromete ba publiku katak sei tane no hatur programa ba tinan lima ne'e, iha vizaun no asaun politika Partido Democratico nian, nudar parte integrante hosi koligasaun CNRT no FM..

Ho hanoin atu fo neon na'in no matan moris iha prosesu implementasaun programa ne'e iha Planu de Asaun Anual, maka Partido Democratico mos husu ba governu, tau konsiderasaun ba preokupasaun no sugestaun nebe deputados Bancada Partido Democratico hato'o durante debate loron tolu nia laran.

Bancada Democratica mos hakarak fo apelo ida ba Governu atu iha Disciplina Orsamental no Disciplina iha Execusaun dos Programasaun iha Planu de Asaun Annual tamba Povu hein hela atu hetan asesu ba estradas nebe diak, ba be mos, no nesidades basiku seluk tan hodi hadia sira nia moris.

Nune mos, Partido Democratico husu ba governu atu konsidera mos preokupasaun no sugestaun nebe opozisaun hato'o durante debate ne'e tamba knar opozisaun iha debate programa politiku mak atu fo neon na'in ba Governu hodi define prioridade ba preokupasaun no nesidade povu nian.

Mos, Oposizaun nia knar iha debate planu de asaun anual mak atu azuda governu hodi difini stratezia, tatika no indikator ba implementasaun planu no aktividades durante tinan ida nia laran.

Votus de susesu ba Koligasaun no esperansa ba partisipasaun ativa no konstrutiva husi opozisaun ba implementacao ba Programa V Governu Constitucional.

Obrigada barak.

Lurdes Bessa
Chefe de Bancada, Partido Democratico